

Hulandes ta para fuerte tras di Comisario van der Straten

Minister Pechtold a manda carta pisa pa Minister Rudy Croes

ORANJESTAD(AAN): Tur cos ta musta cu e bishita otro siman di Minister Alexander Pechtold di Hulanda lo no ta uno di mucho cortesía. Net prome cu e mandatario a cuminsa prepara su maleta pa biaha pa Antiyas y Aruba, el a manda un carta fuerte pa tanto Minister Rudy Croes, pero tambe pa Minister Presidente Nel Oduber. Ta trata aki di un contesta riba e carta cu e titular di Husticia di Aruba a manda pa Hulanda relaciona cu e funcionamiento di Jan van der Straten como Comisario di Polis di Aruba.

Manera cu DIARIO a informa e siman aki den forma exclusivo, t'asina cu Minister Rudy Croes, cu consentimiento di Prome Minister Oduber, a dicidi di manda un carta pa Hulanda den cual e mandatario ta manda pidi Hulanda pa nan stop e "ter beschikkingstelling" di e funcionario Hulandes den Cuerpo Policial di Aruba. Den e carta Minister Rudy Croes ta papia di falta di confianza cu e tin den Jan van der Straten. Esaki ta basa riba e hecho cu Jan van der Straten a duna ordo na e polisnan pa bay detene dos empleado di Consejo di ministronan sin cu e tabatin permiso di Ministerio Publico pa realisa tal detencion.

Wel, si Minister Rudy Croes a pensa cu elo haya sosten di Gobierno di

Hulanda den su afan pa kita Jan van der Straten for di trabao, anto el a ekiboca. Parse cu Hulanda tin intencion serio di para duro tras di nan empleado, no obstante cu ta dos luna mas so e Comisario tin pa traha pa Gobierno di Aruba.

Por a ripara cu ta palabranan fuerte a cay den e carta di Minister Pechtold na Minister Rudy Croes di Aruba. Frasenanan manera "Mi ta lamenta e hecho cu Bo no tin confianza mas den e funcionamiento di Sr. Jan van der Straten despues cu pa añanan largo el a eherce su funcion cu masha sosten pa parti di Gobierno di Aruba. Mi no por y mi no kier saca ningun conclusion riba e circunstancianan cu a conduci pa Bo a cambia di opinion."

Cu e palabranan aki Hulanda ta musta e trio di Prome Minister, Minister di Husticia y Procurador General cu nan entodo caso lo no


forma parti di e wega politico aki. Hulanda a demostra den e carta cu nan si tin confianza den Jan van der Straten, teniendo na cuenta tambe cu ta e mesun Gobierno di Aruba y e mesun Gabinete Oduber 3 a pidi Hulanda pa renoba e contract cu Jan van der Straten tabatin cu Gobierno di Aruba. Ta e mesun Gobierno aki a pidi Hulanda pa laga Jan van der Straten keda den funcion di Comisario pa e por canalisa e proceso di reorganizacion di Cuerpo Policial. Ta e mesun Gobierno aki mes a dicidi den e proceso tambe pa nombre como Korpschef interino y ta e mesun Gobierno a hacie hefe di un distrito. Ta pesey e mandatario Hulandes a bisa su colega di Aruba cu e no tin gana di ni bay pensa kico a conduci Minister Rudy Croes na cambia di opinion asina liher riba funcionamiento di Van der Straten.

Riba e peticion pa kita Jan van der Straten for di su posicion di Comisario y pa sake for di Cuerpo Policial di Aruba, e mandatario Hulandes a bisa: "Por papia riba posicion di Sr. Jan van der Straten solamente ora cu Bo a caba di pone na altura oficialmente riba bo pensamentonan pa cu su funcionamiento y tambe despues di a encamina e camindanan legal pa kite for di su funcion. Den tur e documentacion cu bo a mandami, mi no por a saca afor cu bo a haci esey caba." Aki por mira cu Hulanda di su banda no kier ta esun cu mayan mester bay para dilanti Huez pa splica di con a kita e persona aki for di trabao. Hulanda ta manda bisa Aruba pa Boso mes kite for di trabao y boso mes bay

defende boso mes dilanti Huez y despues Hulanda lo dicidi ki posicion e lo tuma."

Na final por a tuma nota cu Minister Rudy Croes lo no a keda mucho contento cu aki na "Vertegenwoordiging van Nederland in Oranjestad" nan a habri su carta cu el a manda pa Minister Thom de Graaf. Riba esaki tambe e Minister nobo a skibi Minister Rudy Croes cu VNO aki na Aruba a actua corectamente y den cuadro di e instrucionnan cu nan tin pa cumpli cune. Pues, definitivamente Gobierno di Hulanda a para duro tras di nan hendenan y a musta e Gobierno aki cu nan lo no participa na ningun wega politico y cu si bo kier busca pa colga un di su hendenan, percura pa bo tin base legal pa haci esaki.

TELEFONNAN DI DIARIO
582-6747- FAX 582-8551



BEST DEAL

Tel: 5827100

(Pariba di Aruba Bank, Paradera)

BEST SHOPPING DEAL

Turibana Plaza

Tel: 5865455



Natural Bra
Afl. 35,=